

Meerartaarnermut atatillugu aningaasaateqarfiliornissamut apeqqutip sulisitsisut akornanni isumaqatiginninniarnissamut ilaatinneqarsinnaaneranut periarfissaq pillugu Naalackersuisut misissuisitsinissamik suliniuteqaqqullugit peqquneqarnissaannik Inatsisartut aalajangiiffigisassaattut siunnersuut. Meerartaarnermut atatillugu aningaasaateqarfiup maannakkut ullormusiaqartitsisarnermiit pitsaanerusumik akissarsiallit atugassaqatitaalernissaat qulakkiissavaa.

(Inatsisartunut ilaasortaq Naaja Nathanielsen, Inuit Ataqatigiit)

Akissuteqaat

(Aningaasaqarnermut Aatsitassanullu Naalackersuisoq)

1. Siullermeerneqarnera

Kalaallit Nunaanni meerartaarnermut atatillugu aningaasaateqarfimmik pilersitsinissaq pillugu aalajangiiffigisassatut siunnersuummut Naalackersuisut qujapput siunnersuummilu siunertarineqartunut isumaqataallutik.

Aningaasaqarnikkut toqqissisimaneq meeqqap peroriartortilluarnissaanut pingaaruteqarluinnartuuvoq, taamaammatt meeqqat ilaqutariillu meerartallit atugaasa pitsanngorsaviginissaat sulissutigiuartariaqarpoq. Politikkikkut suliniutit meeqqat alliarturnerminni atugaannik pitsanngorsaaataasussat pisariaqartinneqarput. Naalackersuisut kissaatigaat tamanna pitsaanerpaamik angusaqarfiusussanngorlugu ataqatigiissaakkamik sulinikkut pissasoq. Taamaammatt inuiaqatigiinni kikkut tamarmik suliffeqalernissaat qulakkeerniarlugu Naalackersuisut suliaqarput, taamatullu inuiaqatigiinni kikkut tamarmik ilaqutariit meerartallit kisimik pinnatik aningaasaqarnikkut ajunngitsumik atugaqalernissaat qulakkeerneqassalluni.

Naalackersuisut isumaqataapput, meerartaarnermut atatillugu isumaqatigiissutit aningaasaqarnikkullu atugassarititaasut suliffeqarfimmi illuatungeriit isumaqatiginninniutigisassagaat.

Taamaattumik Naalackersuisut marsip 26-ani 2015-imi sulisitsisunik ataatsimiisitsipput. Tunngaviatigut sulisitsisut meerartaarnermut atatillugu aningaasaateqarfiliornissamut tunuarsimaanngillat, tassami meerartaarnermut atatillugu aningaasaateqarfik assigiinnerusumik atugassaqartitsilersussaassammatt aammalu inuussutissarsiortunut mikinerusunut aningaasaqarnikkut atugassarititaasut pitsaanerulernissaannut tamanna aamma qulakkeerinnittuusussaammatt.

Sulisitsisut siunnersuut isummersorfigiuminaatsissimavaat, meerartaarnermut atatillugu aningaasaateqarfissap qanoq pilersinneqarsinnaanera ilaatigut pillugu paasissutissat sukumiinerusut amigaatigineqarmata. Apeqqutigineqartut ilagaat: Meerartaarnermut atatillugu aningaasaateqarfissap sulisitsisut namminersortut pisortallu suliffeqarfii matussusertassavai, tassami pisortat suliffeqarfiini tamani meerartaarnermut atatillugu sulinngiffeqartarnerit akilerneqartarmata? Pingaarutilik alla tassaavoq, sulisut sulinermi isumaqatigiissutitigut siusinnerusukkut isumaqatiginninniutigineqareersutitigut meerartaarnermut atatillugu sulinngiffeqarnerminnut akiliisareersimasut qanoq taakkua inissisimalernissaat.

Aammattaaq meerartaarnermut atatillugu aningaasaateqarfiliornissamut apeqqut isumaqatiginninniarnissanut ilaatinneqarsinnaaneri periarfissaassanersoq sulisitsisut akornanni oqallisigineqarpoq. Apeqqummut tassunga atatillugu meerartaarnermut atatillugu aningaasaateqarfissap aningaasalersorneqarnissaanut tunngasut paasilluarneqarnissaat pingaaruteqarpoq. Aningaasaateqarfimmut taamaattumut pisortat qanoq aningaasaliisarnissaat siunnersuuteqartup takorloorpaa? Oqallinnermi aamma eqqaaneqarpoq, meerartaarnermut atatillugu aningaasaateqarfissaq aallaaviatigut inatsisitigut aalajangersaavigineqarsinnaasoq.

Ataatsimut isigalugu Naalakkersuisut isumaqarput, sulisitsisut siunnersuut tamakkiisumik isummerfiguminaatsikkaat, siunnersuut pissutsit qitiulluinnartut pillugit tunaartarisassanik imaqanngimmat soorlu:

- Aningaasalersuineq – pisortanit aningaasalersuineq allatullu nammineq aningaasalersuineq
- Meerartaarnermut atatillugu aningaasaateqarfiup sulinngiffeqarneq tamaat imaluunniit taassuma ilaa kisiat akilertassavaa
- Taavami sulinermi isumaqatigiissusiatigut isumaqatigiissusioreersimasut qanoq pissappat

Naalakkersuisut siunnersuummi siunertarineqartut isumaqatigaat, kisianni Naalakkersuisut siunnersuut maannakkut piviusorsiunngitsutut isigaat. Tamanna tunngavigalugu Naalakkersuisut maannakkut siunnersuut isikkumisut isikkoqartillugu tapersorsorsinnaanngilaat, taamaattumillu siunnersuutip itigartitsissutigineqarnissaa inassutigalugu. Taamatut oqaaseqarlunga matumuuna siunnersuut Inatsisartunut suliarineqartussanngorlugu ingerlateqqippara.